

Visualisà musica contemporana

Nov film da Manfred Ferrari

■ (anr/fa) En cooperaziun cun la TvR ha realisà il cineast Manfred Ferrari il film «Dissegnar Musica». En quel vegnan purtretads ils fragliuns e musicists grischuns Riccarda Caflisch e David Sontòn. «La Musica Nova porscha tantas novas pussaivladads da suns e tuns, ch'igl è in'aventura da sa sfundrar lien», di il giuven cumponist grischun David Sontòn Caflisch. Adina dapli glieud sa lascha fascinar da la musica contemporana. Quai vala er per il cineast liber Manfred Ferrari: «Avant trais onns sun jau ì l'emprima giada ad in da lur concerts cuminaivels che David e Riccarda han dà a Cuiira en la 'Konzertreihe ö!', e jau era fascinà.» Gia quella giada è naschida l'idea da far in film davart dals dus fragliuns. In onn pli tard han quels dumandà Ferrari, sch'el fetschia la reschia tar l'opera pledada Kilroy. «Quest project cuminaivel m'ha alura dà l'impuls da realisar mes intent e da far il film, in purtret dubel, sur dals fragliuns Caflisch», sa regorda Manfred Ferrari. Il film ch'el ha realisà en cooperaziun cun la Televisiun Rumantscha (TvR) ha gù premiera mardi saira a Cuiira en il teater da citad.

Grazia al «pacte de l'audiovisuel»

Che la TvR haja la pussaivladad da pudair realisar 47 giadas l'onni films da 25 minutas lunghhezza, ha declerà Mariano Tschuor, il schefredactor da RTR. La gronda part da questas emissions fan ils redactors da la TvR. «Ma grazia a l'uschenumnà Pacte de l'audiovisuel da la SRG pudain nus gidar cineasts libers a finanziar lur films», ha ditg Tschuor, «uschia èsi stà er cun il film da Manfred Ferrari.» Quel ha ditg ch'el saja er stà pli che cuntent d'avair pudì collavurar cun in team uschè cumpetent: A la camera Felix von Mural, per il tun era respunsabel Thomas Gassmann e per il tagl Mirco Manetsch.



Pronts per la premiera: Riccarda Caflisch, Manfred Ferrari e David Sontòn.

FOTO F. ANDRY

Impressiuns per part surrealas

En il film «dissegnar musica» quintan la flautista Riccarda Caflisch ed il violinist e cumponist David Sontòn davart la rolla che la musica gioga en lur vita. Els èn vegnids filmads en differents lieus: A Basilea nua che David viva e lavura mintgatant, a Val S. Pieder en l'Hotel Therme nua ch'el è engaschà sco cumponist da chasa, a Tumeigl nua che abita Riccarda, a Paris nua ch'ella dat gist in concert cun la furmaziun Klangforum Wien ed ad Andeer nua ch'ils fragliuns han passentà lur uffanza. Qua sunan els en ina chava da granit. Tar singulas scenas èn ils protagonistes en via di, en il tren, en il tram, ed enstagl da ves-

sair la cuntrada che passa speravia vesan ins dator fanestra notas da musica scrittas a maun. «Mia finamira era da visualisar la musica contemporana ed il process da cumponer», ha ditg Manfred Ferrari suenter la preschentaaziun, «e sche jau hai pudì svegliar interess per questa musica fascinanta sun jau pli che cuntent.»

«La gronda part schess jau anc adina»

Ch'i saja stada ina bell'experiencia, ha ditg Riccarda Caflisch suenter la premiera, «er sch'i nun era per mai sco mamma d'in pitschen uffant adina uschè simpel da chattar ils termins per sa laschar fil-

mar». Ch'ella saja stada stutta quant temp che saja necessari per far in film documentar, ha ella cuntinuà, «ma igl ha valì la paina, Manfred, Felix, Thomas e Mirco han fatg ina lavur grondiusa». Ses frar David aveva spetgà per vesair il film propi fin tar la premiera a Cuiira. Ch'i saja stà fitg interessant a vesair tge ch'il reschissur haja fatg or dal material filmà, ma er ad udir tge ch'el haja ditg da sia lavur sco cumponist. «Ma uss sun jau quietà», ha ditg David Sontòn riend, «trais quarts da quai schess jau anc adina.»

Il film «Dissegnar Musica» vegn mussà l'emprima giada dumengia, ils 9 settember 2007 a las 17.30 sin SF1.